



Notat

Dato: 16.01.2017
Arkivsak: 2014/23406-6
Saksbehandlar: sisover

Til: Utval for opplæring og helse
Fylkesutvalet
Fylkestinget

Frå: Fylkesrådmannen

Statusrapport for samanslåing av dei vidaregåande skulane i Etne og Ølen

Fylkesrådmannen viser til vedtak i fylkestinget i desember 2016 i sak 98/2016 *Eit framtidretta skuletilbod for ungdom frå Etne*:

«Fylkestinget ber fylkesrådmannen halde fylkestinget løpande orientert om resultatane av samarbeidet med Rogaland fylkeskommune med tanke på elevar, tilbod og forholda til dei tilsette (pkt 3).»

Vedtaket om Etne vidaregåande skule (vgs) fatta i fylkestinget i oktober vert følgt opp gjennom samarbeid på fylkesnivå mellom Hordaland og Rogaland fylkeskommunar, gjennom samarbeid mellom dei to skulane i Etne og Ølen og i interne arbeidsprosessar på Etne vgs.

Fylkestinget i Rogaland har vedteke å opne for innsøking til skulen i Ølen for alle tilboda som i dag vert gitt ved Etne vgs. Dersom innsøkinga tilseier at tilboda kan startast, vil dei bli vidareført ved Ølen vgs. Skulen i Ølen vert no renovert, og med unntak av lokale for vidaregåande kurs 2 (Vg2) Køyretøy og Arbeidsmaskiner skal alt vere på plass til skulestart. Rogaland fylkeskommune er i ferd med å inngå ein avtale med Hordaland om leige av lokale og utstyr for Vg2 Køyretøy og Arbeidsmaskiner ved undervisningsstad Tesdal. Dei har behov for å leige to-tre år til dei har ferdige nye verkstadlokale i Ølen. Innsøkinga til skulen i Ølen vil vere klar rett etter 1. mars, og på neste møte i fylkesprosjektgruppa 7. mars er gjennomgang av tala eit tema. Dette møtet er fjerde samarbeidsmøtet på fylkesplan for å leggje best mogleg til rette for gjennomføringa av skulebruksplanen i regionen.

Det første samarbeidsmøtet mellom dei to skulane etter vedtaket i oktober 2016 vart halde 3. november. Skulane har sidan dette arbeidd mykje med å sikre god søking til dei nye tilboda ved Ølen vgs. Det har vore lagt stor vekt på samhandling i møta med rådgjevarar, føresette og elevar i regionen når dei to skulane har informert om tilboda. Ein vil etter kvart også ta opp arbeid med læreplanar, planlegging og læremiddel knytt til dei nye tilboda ved Ølen vgs. I dette arbeidet vil tilsette frå Etne vere sentrale, i og med at det er dei som kjenner programområda slik dei er gjennom informasjonsarbeidet om tilboda.

Rogland fylkeskommune vil lyse ut ledige stillingar i skulane sine i byrjinga av februar, og dette gjeld også Ølen vgs. Tilsettingar ved skulen i Ølen vil vere klare i byrjinga av mars. I haust har dei tilsette gjennomført

kompetansekartlegging og fått tilbod om ein omstillingssamtale. For tilsette i Hordaland fylkeskommune gjeld rettane som går fram av reglane for omstilling. Dei som ikkje får arbeid i Rogaland, eller som ønskjer overføring til ein skule i Hordaland, vil bli følgde opp av arbeidsgjevar i nært samarbeid med HR-seksjonen.

Arbeidet med omstillinga på skulen starta i oktober med oppretting av omstillingsutval (OMU), og det er regelmessige møte på skulen med representantar for dei tilsette, leiinga ved skulen og fylkesnivået. Blant hovudoppgåvene til omstillingsutvala er å halde seg orientert om arbeidsmiljøet på skulen, sjå til at informasjon når fram til alle tilsette og følgje opp dei tilsette i prosessstega som omstillinga ved skulen krev.

Våren 2017 er det planlagt fire omstillingsutvalsmøte. Dei er sett i samanheng med møte i fylkesprosjektgruppa og med samarbeidsmøte mellom dei to skulane for å sikre best mogleg informasjonsflyt. Frå fylkesnivået deltek til vanleg representant frå HR-seksjonen, fylkeshovudverneombodet og ein representant frå dei hovudtillitsvalde på OMU-møta i tillegg til regionleiar.

Fylkesrådmannen har i denne meldinga gjort greie for møtearenaer og arbeidsprosessar i samanslåinga mellom Etne og Ølen vidaregåande skular. Først i mars månad vil det vere klart om dei nye tilboda ved Ølen vgs har god nok søking til å bli vidareførde. Det er også i mars at tilsettingar ved Ølen vil vere på plass. Dette gjer at det er først til møtet i juni at fylkesrådmannen i større grad kan leggje fram resultat frå arbeidet.